

HELDU DEN MAIATZAREN 26KO KONTZEJU HAUTESKUNDEETARAKO AGINDUAK

Martxoaren 27ko 35/2019 Foru Dekretuak, zeina **apirilaren 2ko NAOan** argitaratu baitzen, Nafarroako kontzejuen hauteskundearen deialdia egin zuen; hauteskundeok heldu den maiatzaren 26an eginen dira, udal hauteskundeekin eta Nafarroako Parlamenturako hauteskundeekin batera.

Kontzeju hauteskundeetan martxoaren 16ko 12/1991 Foru Legea bete beharko da, Nafarroako Kontzejuetako hauteskunde prozesuak arautzen dituen (35. NAOa, martxoaren 20koa).

Duzuen populazioarekin, presidenteak eta lau kidek osatutako batzordea da zuen kontzejuari dagokion gobernu araubidea, non ez diozuen heldu Nafarroako Toki Administrazioa Berrantolatzeke otsailaren 4ko 4/2019 Foru Legean aurreikusitako aukerari, zeinak bide ematen baitu, Batzordeak gehiengo osoz hartu badu erabakia kontzeju hauteskundearen deialdia egin baino lehen, kontzeju ireki gisa eratzeko, betiere Foru Komunitatearen Administrazioari jakinarazi ondoren.

Bestalde, garrantzitsua da oroitaraztea **maiatzaren 25ean** bukatuko dela kontzeju batzordeetako oraingo buruen eta kideen agintaldia. Horrenbestez, egun horretatik aitzin eta hautetsi berriek beren kargua hartu eta tokiko udalbatzak eratu arte, kontzejuen batzordeek jardunean jarraituko dute administrazio arrunteko aferetarako soilik, eta sekula ez dute gehiengo kualifikatua behar duen erabakirik hartuko.

Ondoren, argibide gehiago emanen ditugu hautagaitzak aurkezteari eta hauteskunde prozesuari beste alderdiei buruz.

1.- HAUTAGAI ZERRENDAK AURKEZTEA

Alderdiez, koalizioez eta alderdien federazioez gain, beren hautagai-zerrenda aurkez dezakete hautesle-elkarteek ere. Azken horiek udalerriko hautesle-errolan izena emana duten hautesleen sinadura-kopuru bat behar dute, eta sinadura horiek notarioak egiaztatuko ditu, edo, kontzejua zer udaletan dagoen, horko idazkariak. Elkartearen hautagaitza abalatzeko sinaduren kopuruak gainditu behar du izena emandakoen %1, baina ezin da 10etik beherakoa izan.

Hauteskunde Araubide Orokorrari buruzko Lege Organikoaren 44. artikuluan xedatuarekin bat, alderdiek, federazioek, koalizioek edo hautesle-elkarteek ezin dute hautagaitzarik aurkeztu, baldin eta judizialki legearen kontrakotzat jo eta desegin edo bertan behera utzitako alderdi politiko baten jardunari jarraitzen badiote edo hura ordezkatzan badute. Ondorio horietarako, kontuan hartuko da funtsezko antzik dagoen hautagaitzak zuzendu, ordezkatu edo administratzen dituzten pertsonen egituren, antolamenduaren eta funtzionamenduaren artean, edo finantzabideen edo baliabideen jatorriaren artean, edo beste edozein gauza aipagarrikerik badagoen, jarraipen hori edo ordezkatzeko hori badagoela pentsatzeko bide ematen duenik, hala nola indarkeria edo terrorismoa babesteko jarrera.

Hautagai-zerrendak apirilaren 15etik 20ra bitarte aurkeztu behar dira, biak barne, zein bere Eskualdeko Hauteskunde Batzordean. Kasu guztietan, hautagaitza aurkezteko idazkiak honako hauek jaso behar ditu:

- a) **Argi eta garbi adierazi behar dira alderdiaren, federazioaren, koalizioaren nahiz talde sustatzailearen izena, siglak eta ikurra.**
- b) **Gehienez bost hautagairen izen-abizenak.**
- c) **Hautagaiak hautagai-zerrenda ondartzeko dutela dioen aitortpena.**
- d) **Hautagaiak hautagarriak direla egiaztatzen duen dokumentua.**
- e) Hautesle-elkartean kasuan, **aipatutako sinadura kopuruaren ziurtagiria (10 gutxienez).**
- f) Hautesle-elkartean kasuan, **hautagai-zerrendaren ordezkariaren izendapena.**

Ordezkariaren eginkizunak izanen dira:

- Hauteskunde-mahaietarako artekariak izendatzea eta akreditatzea. Izendapena hauteskundeak baino hiru egun lehenago arte egin daiteke. Artekaria izateko, hauteslea izan eta hautesle-eroldan izena emana egon behar da. Nolanahi ere, beste hauteskundeetan ez bezala, ez da nahitaezkoa izanen izena emanda egotea beren eginkizunak beteko dituzten hauteskunde-barrutiko eroldan.

Aurrekoarekin bat, izena emanda ez badaude bere eginkizunak beteko dituzten hauteskunde-barrutian, eskualdeko hauteskunde-batzordeak eskatu beharko dio Hauteskunde Erroldaren Bulegoari hautesle-eroldan izena emanda dagoela egiaztatzen duen ziurtagiria premiazkotasunez igortzea, salbu eta artekari izendatua izan denak alde aurretik aipatu ziurtagiria erakusten badu.

Hauteskunde Batzorde Zentralaren urtarrilaren 23ko 1/2019 Aginduarekin bat, zeina artekariaren botoari buruzkoa baita hauteskunde-prozesu batzuk batera egiten diren kasuetan, artekariak zer mahaitan dauden akreditaturik, horretan eman beharko dute botoa, baldin eta, betiere deitutako prozesu guztietan bozkatu behar duen hauteskunde-barrutiaren barnean badago mahi hori, eta hori betetzen ez bada prozesuetako batean, posta bidez bozkatu beharko du guzti-guztietan.

Apirilaren 24an argitaratuko dira NAOan aurkeztutako hautagaitza guztiak.

Apirilaren 30ean argitaratuko dira, NAOan ere, onartutako hautagaitzak.

2.- HAUTESKUNDE KANPAINA

Hauteskunde-kanpainak hamabost egunez iraunen du, ostirala den maiatzaren 10eko gauerdiko zeroetatik ostirala den hil bereko 24ko gauerdiko hogeita lauak arte. Epe horretatik kanpo, debeku da ezein hauteskunde-propagandaren ekintzarik egitea.

3.- BOZKETA ETA ZENBAKETA.

Kontzeju hauteskundeetan, udal hauteskundeetan eraturako mahai beretan egingen da bozketa.

Ondorio horietarako, udal hauteskundearen mahaia bakarra bada, bertan egingen da udalerriko kontzejuei dagozkien bozketa ere, eta, horretarako, hautestontzi bana izanen dute kontzejuek.

Bat baino gehiago badira hauteskunde-mahaiak, hautesle banaketa bera izanen du kontzejuei dagokien bozketak, eta, horretarako, kontzeju bakoitzak bere hautestontzi berariazkoa izanen du mahai bakoitzean.

Bozketa goizeko bederatzietan hasiko da, eta arratsaldeko zortziak arte iraunen du, etenik gabe.

Bozketa sekretua da, eta hautesleak lau boto eman ditzake gehienez aurkeztu eta onartu diren hautagai guztien artean.

Hauteskunde-mahaietan egiten den zenbaketa publikoa da, eta zenbaketa horren akta bete behar da, hauteskunde-legediak ezarritako terminoetan.

Lehendabizi, udal hauteskundeen zenbaketa egin behar da, eta, bigarrenez, kontzeju hauteskundeei dagokiena, kontzejuen hurrenkera alfabetikoari jarraikiz.

Eskualdeko hauteskunde-batzordeak izanen du zenbaketa orokorra eta hautagai hautetsien izendapena egiteko eskumena.

Argibide gehiago nahi izanez gero, Federazioaren web orrian jaso dezakezue (www.fnmc.es). “Udal hauteskundeak” izeneko atalean hauteskunde-egutegia aurki daiteke, bai eta hauteskundeei buruzko hainbat informazioa ere, unean-unean eguneratuko dena.